


# O CUCO E A ALDEA

Por Xosé Luís Vilar Hermida

*Un dos animais más enraizados na cultura popular é o cuco*



Ilustracións: *Guía das Aves de Galicia (Ed. Bahía)*

Refráns, cantigas e adiviñas refiren-se frecuentemente a esta ave que esperta o interese e a curosidade da xente do campo, debido, fundamentalmente, a tres características: á sua inusual forma de cría; a de ser unha ave migratoria e, sobretodo, á sua potente, monótona e inconfundible voz, que pode ouvirse a varios quilómetros de distancia.

Podemos dizer que o cuco é a voz do bosque. No bico dunha árbore, o macho, que domina o territorio, canta co pico pechado para producir maior resonancia, ao mesmo tempo que move o rabo espasmódicamente para equilibrar a fuerza con que a gorxa impulsa o berro. O seu obxectivo é atrair as fémias con fins reproductores e avisar aos outros machos que esa zona, e polo tanto o alimento nela contido, é del e dos seus descendentes.

O cu-cu típico expande-se polo bosque (hábitat preferido por este animal, ainda que tamén pode presentarse en dunas, prados, ...), chega ao campo e mete-se nas aldeas. O campesiño sabe entón que empeza a primavera, porque o cuco chega pontual ás terras galegas, tan pontual como o relóxio que leva o seu nome: «Entre maio e abril sae o cuco do seu cubil»

É indicativo de certas faenas agrícolas: «*Cando canta o cuco logo ven o gran ao sulco*».

Certos manxares deixan de ser sabrosos: «*Mentres canta o cuco non comes raia nen pulpo*»

Indica-nos asimesmo o cuco o tempo que vai vir: «*No tempo do cuco, pola mañán mollo-me e pola tarde enxuto*».

Ainda que se canta seguido: «*Canta o cuco, tempo enxuto*».

Unha das suas habilidades más surprendentes son as adiviñatorias: «*Cuco de maio, cuco de abril, cantos anos hei de viver?*», ou ben: «*Cuco rei, cuco rei, cando casarei?*»; «*Cuco que estás no outeiro, cantos anos me das de solteiro?*»; «*Cuco, cuco, rabo de zorra, cantos anos faltan para a miña boda?*». Cada canto de cuco significará un ano de vida para a primeira pregunta e un ano de soltería para as outras.

As veces, o cuco é unha ave de mal agoiro. Tempos de inquedanzas económicas apresentaranse se nos colle sen almozar ou ben sen cartos no peto.

Unha ave con tantas facultades, polo que si ou polo que non, é mellor té-la como amiga e o labrego refire-se a ela con nomes familiares (o Bieito, o Farruco,...). As veces, os nenos arremedian o seu canto con «*tapa o cu, tapa o cu*», ao que el non dubidará en responder cun «*Tapa o teu, tapa o teu*».

Un amigo ledo («*Estar contento como un cuco*»), pero, como xa veremos máis adiante, un amigo mui «**cuco**» non que ninguén pode fiar-se.

Sexa como sexa, nas aldeas todo o mundo sinte-se engaiolado polo seu canto:

*Canta o cuco,  
canta o merlo,  
cantan todos os paxaros  
Eu tamén cantei,  
hoxe choro desenganos.*

O labrego canta-lle aos nenos:

*Xa nace o trigo,  
xa temos pan  
xa canta o cuco  
xa temos verán*

Os poetas tampouco podian substrairse:


*O cuco, cuco, cuqueiro  
O cuco, cuco, cucou  
Madrugón e cantareiro  
Cantareiro e madrugón*

E que falar dos grandes músicos clásicos (Brahms, Mozart, Beethoven) que saltaron diversas sonatas co canto deste paxaro?

En debén, podemos dizer que, ainda fácil de ouvir, o cuco é un paxaro tímido e fuxidio, que difficilmente logra ver-se.

Pero, sen dúbida, a característica más curiosa e incríbel desta ave é a que afecta a factores derivados da sua reproducción. O cuco non aniña os ovos, nem mantén aos seus fillos, utilizará outros paxaros que conviven con el no monte, enganando-os para que lles realicen estas funcións. É un caso significativo de niñoparasitismo.

Cando á fémia lle chega o momento de poñer, vixia algun paxaro que aniña perto e, nun descuido deste, pon un ovo no seu niño, ao mesmo tempo que retira un dos do paxaro parasitado, que non se dará conta do engano. A fémia do cuco



pon de 8 a 12 ovos e, polo tanto, terá que repetir esta operación de 8 a 12 veces; iso quer dicer ademais que pode reter os ovos dentro do seu corpo de 1 a 7 dias, até que vai atopando e enganando ás suas vítimas. Neste tempo o embrión vai-se desenvolvendo igual dentro do corpo da nai para que, cando sexa a posta, a cria non nazca con retraso respecto á niñada parasitada.

O cuco emprega diversas técnicas para depositar o ovo no niño adecuado. Naqueles que están situados nun burato, sentará-se no burato e deixará cair aló o ovo; nos globosos, como o do carizo, pon o seu ovo no chan e, co pico, introduce-o no niño, ao mesmo tempo que, tamén co pico, retirará outro.

As espécies más parasitadas polo cuco son, sobretodo, paxaros (peizocos, lavandeiras, papuxas, fulepas, chascas) e incluso algunha predadora como os picanzos.

As fémias, normalmente, especializan-se en parasitar unha espécie concreta, posibelmente a mesma que as criou, o que implica que poñen ovos de forma, tamaño e cor igual que os da espécie parasitada. Esta, unha vez chegada ao niño, non reconoce o engano, xa que as diferenças entre os seus ovos e o ovo intruso son escasas.

O pequeno cuco nace, xeralmente, antes que os seus desafortunados compañeiros de niño, xa que o período de incubación do cuco é mui pequeno. Unha vez nado, revolveráse e escachará os demais ovos. Os supostos pais alimentarán-

no até que sexa muito máis grande que eles, atraídos pola mancha que presenta no interior do pico e que lles impulsa a dar-lles de comer.

Este comportamento fai que o cuco teña na xente do campo os seus detractores:

*Canta cuco ou cala cuco  
eu en ti xa non che creo  
desque vas poñer  
os teus ovos en niño alleo.*

Esta capacidade de engano serve de xogo aos rapaces.

Asi, aos nenos-as di-se-lles: «Tedes que madrugar, senón vai-vos enganar o cuco».

Os rapaces bulran-se entre si: «Enganou-te o cuco?» «Si, pero non me enganou a bubela». E as rapazas din-lles aos rapaces: «Eres mui cuco, pero vexo-te vir».

Apesar dos seus enganos, os labregos agradecen que o cuco elimine a procesionaria dos pinos, xa que é o seu alimento preferido, ademais de eirugas, lesmas,...

A finais de xuño marcha o cuco cara ás zonas máis quentes. O labrego sabe que voltará:

*Catro aves escollidas  
son as que pasan o mar  
o cuco e más a anduriña,  
a rula e o paspallás.*

Volverá o cuco o próximo ano e esperaremo-lo con impaciéncia, porque

*Se non viches o cuco  
a mediados de abril,  
ou morreu o cuco  
ou vai vir o fin.*

Seguramente aos nosos labregos non lles falta razón. ■

*tan  
natural*



**A MONTAÑA  
COOPERATIVA A QUEIROGA**

Pedidos ó tfno. 981 - 34 03 02 - FENE - A CORUÑA

**COLLEITA PROPIA**